

TANGAZO LA SERIKALI NA 167 la tarehe 10/03/2023

**SHERIA YA MAHAKAMA ZA MAHAKIMU,
(SURA YA 11)**

KANUNI

(Zimetengenezwa chini ya kifungu cha 71(1))

KANUNI ZA MAWAKILI NA WAENDESHA MASHTAKA KATIKA MAHAKAMA ZA
MWANZO ZA MWAKA 2023

MPANGILIO WA KANUNI

Kanuni Maelezo

**SEHEMU YA KWANZA
MASHARTI YA UTANGULIZI**

1. Jina.
2. Matumizi.
3. Tafsiri.

**SEHEMU YA PILI
UANZISHAJI, UWAKILISHI NA UTARATIBU**

4. Desturi na taratibu.
5. Notisi ya uwakilishi.

**SEHEMU YA TATU
MASHARTI YA JUMLA**

6. Uahirishaji wa mashauri.
7. Mavazi.
8. Waraka wa utambulisho.
9. Ukadiriaji gharama.

JEDWALI

SHERIA YA MAHAKAMA ZA MAHAKIMU,
(SURA YA 11)

KANUNI

(Zimetengenezwa chini ya kifungu cha 71(1))

KANUNI ZA MAWAKILI NA WAENDESHA MASHTAKA KATIKA MAHAKAMA ZA
MWANZO ZA MWAKA 2022

SEHEMU YA KWANZA MASHARTI YA UTANGULIZI

- Jina 1. Kanuni hizi zitajulikana kama Kanuni za Mawakili na Waendesha Mashtaka katika Mahakama za Mwanzo za mwaka 2022.
- Matumizi 2. Kanuni hizi zitatumika kusimamia mawakili na waendesha mashtaka katika mahakama za mwanzo.
- Tafsiri
Sura ya
342 3. Katika Kanuni hizi, isipokuwa kama muktadha utahitaji vingenevyo-
"wakili" maana yake ni kama ilivyotafsiriwa chini ya kifungu cha 2 cha Sheria ya Mawakili na inajumuisha watu waliotajwa chini ya kifungu cha 3 cha Sheria hiyo;
"mahakama" maana yake ni mahakama ya mwanzo;
"Mkurugenzi wa Mashtaka" maana yake ni kama ilivyotafsiriwa chini ya Sheria ya Ofisi ya Taifa ya Mashtaka;
- Sura ya
430 "hakimu" maana yake ni hakimu mkazi anayesilikiza mashauri katika mahakama; na
- Sura ya
430 "mwendesha mashtaka" maana yake ni kama ilivyotafsiriwa katika Sheria ya Ofisi ya Taifa ya Mashtaka.

SEHEMU YA PILI
UANZISHAJI, UWAKILISHI NA UTARATIBU

Desturi na
taratibu

4. Namna ya kufungua mashauri, desturi na taratibu za mahakama katika masuala yanayowahusisha mawakili na waendesha mashtaka zitakuwa kwa mujibu wa sheria zinazoongoza desturi na taratibu zinazotumika katika mahakama za mwanzo.

Notisi na
ahadi ya
uwakilishi

5.-(1) Wakili anayekusudia kumwakilisha mhusika yeyote katika mahakama atatoa taarifa na kuweka ahadi kwa maandishi mahakamani kwamba, ana maelekezo kamili na atahudhuria mahakamani kila mara shauri litakapotajwa au kusikilizwa.

(2) Baada ya kupokea taarifa na ahadi ya wakili chini ya kanuni ndogo ya (1), mahakama itajiridhisha iwapo wakili huyo ameajiriwa kumuwakilisha mhusika.

(3) Notisi na ahadi chini ya kanuni ndogo ya (1), vitakuwa kadiri itakavyowezekana, kama ilivyoanishwa katika Fomu A kwenye Jedwali la Kanuni hizi.

(4) Iwapo Mkurugenzi wa Mashtaka au mtu yeyote aliye chini yake ataona kuwa kuna ulazima wa shauri kuendesha na mwendesha mashtaka, ataijulisha na kuiahidi mahakama kwa maandishi kuwa, mwendesha mashtaka atahudhuria mahakamani wakati wowote wa kuendesha shauri hilo kama inavyoanishwa katika Fomu B kwenye Jedwali la Kanuni hizi.

(5) Wahusika wote katika shauri watapewa au kujulishwa juu ya notisi chini ya kanuni hii ndani ya wakati unaofaa kabla ya wakili au mwendesha mashtaka kuhudhuria kwa mara ya kwanza mahakamani.

SEHEMU YA TATU
MASHARTI YA JUMLA

Uahirishaji
wa
mashauri

6.-(1) Usikilizaji wa shauri utakapoanza, utaendelea hadi mashahidi wote waliohudhuria mahakamani siku hiyo watakapotoa ushahidi, isipokuwa kama, kwa sababu zitakazoandikwa katika mwenendo wa shauri, mahakama

inaona kuna umuhimu kuahirisha usikilizaji wa shauri hilo hadi siku nyingine.

(2) Wakili au mwendesha mashtaka kuhudhuria katika mahakama nyingine au baraza haitakuwa sababu ya kuahirisha shauri.

(3) Endapo wakili au mwendesha mashtaka ameshindwa kuhudhuria mahakamani kwa sababu ya kuhudhuria kwake katika mahakama nyingine au baraza, mahakama itamtaka mhusika kuendelea na shauri yeye mwenyewe na akikataa kuendelea au kama hayupo, mahakama itachukulia kwamba mhusika huyo ameshindwa kuhudhuria mahakamani na madhara ya kutokuhudhuria yatatumika.

(4) Bila kuathiri masharti ya kanuni ndogo ya (2), endapo wakili au mwendesha mashtaka hajahudhuria mahakamani au ameomba ahirisho kwa sababu ya ugonjwa au sababu nyingine yoyote, mahakama haitakubali ombi hilo isipokuwa kama imejiridhisha kuwa wakili au mwendesha mashtaka ni mgonjwa au kwa sababu nyingine yoyote, hawezi kuhudhuria, au ikiwa amehudhuria, hawezi kuendelea, na mhusika anayeomba ahirisho hawezi kuendelea mwenyewe kwa sababu zinazofaa na asingeweza kuajiri wakili au kupata mwendesha mashtaka mwingine ndani ya muda.

Mavazi
T S Na.
118 la
Mwaka
2018

7. Masharti ya Kanuni za Mwenendo na Miiko ya Kazi ya Uwakili kuhusu mavazi ya mawakili wanapohudhuria mbele ya Mahakama za Hakimu Mkazi na Mahakama za Wilaya yatatumika kwa mawakili na wanaoendesha mashtaka katika mahakama.

Waraka
wa
utambulisho

8.-(1) Wakili au mwendesha mashtaka atawajibika kuwasilisha mbele ya mahakama waraka halali au ushahidi mwingine wowote unaomruhusu kuhudumu kama wakili au mwendesha mashtaka, iwapo utahitajika kufanya hivyo.

(2) Wakili au mwendesha mashtaka atakayeshindwa kutekeleza masharti ya kanuni ndogo ya (1) hatakuwa na haki ya kusikilizwa, isipokuwa kama mahakama, kwa sababu itakazoona zinafaa na kuandikwa katika mwenendo wa shauri, itaamua vinginevyo.

Ukadiriaji
gharama
TS Na.
263 la
Mwaka
2015

9.-(1) Ukadiriaji wa gharama za uendes haji mashauri utakuwa kama ilivyoainishwa kati ka Amri ya Ujira wa Mawakili.

(2) Hakimu mfawidhi wa mahakama atakuwa ofisa mkadiriaji gharama chini ya masharti ya Amri ya Ujira wa Mawakili.

(3) Endapo hakimu mfawidhi siyo hakimu mkazi, hakimu mkazi yeyote aliye na cheo kikubwa zaidi katika mahakama hiyo atakuwa ofisa mkadiriaji gharama.

(4) Mhusika yeyote ambaye hajaridhika na uamuzi wa ofisa mkadiriaji gharama, anaweza kuwasilisha maombi ya mapitio katika mahakama ya wilaya.



JEDWALI

(Limetengenezwa chini ya kanuni ya 5(3) na (4))

FOMU A

Katika Mahakama ya Mwanzo ya Wilaya ya.....

Kituo cha

*Shauri la jinai/madai/ ndoa/ mirathi/maombi Na.

..... (mlalamikaji/mdai/mwombaji/mrufani)

Dhidi ya

..... (mshtakiwa/mdaiwa/mjibu maombi/mrufaniwa)

Au

Shauri la Rufaa Na.

(Kutoka Baraza la Kata la katika shauri la madai/jinai Na...la 20...)

..... mrufani

Dhidi ya

..... Mrufaniwa

NOTISI YA UWAKILISHI NA AHADI YA KUHUDHURIA MAHAKAMANI

Mimi....., wakili wa mahakama kuu na mahakama zilizo chini yake, mwenye namba ya usajili na mwenye leseni hai ya uwakili iliyotolewa tarehe.....mwezi mwaka 20....., ninaijulisha mahakama hii kwamba, nimeajiriwa kama wakili katika shauri hili na nina maelekezo kamili ya (jina).....mlalamikaji/mshtakiwa/mwombaji/mrufani/mjibu maombi/ katika shauri/ shauri tarajiwa la jinai/madai/mirathi/ndoa .

Pia, ninaahidi Mahakama kwamba nitahudhuria mahakamani kumuwakilisha katika tarehe itakayopangwa.

Saini.....

Tarehe.....mwezimwaka 20.....

Futa isiyohitajika

FOMU B

Katika Mahakama ya Mwanzo ya Wilaya ya.....
Kituo cha
Shuri la jinai/rufaa/maombi Na.
..... (mlalamikaji/mrufani)
Dhidi ya
..... (mshtakiwa/mjibu maombi/mrufaniwa)
Au
Shauri la Rufaa Na.
(*Kutoka Baraza la Kata la.....katika shauri la Madai/Jinai Na...la 20...*)
..... Mrufani
Dhidi ya
..... Mrufaniwa

NOTISI YA KUENDESHA SHAURI NA AHADI YA KUHUDHURIA MAHAKAMANI

Mimi Mkurugenzi wa Mashtaka/Mkuu wa Mashtaka wa
mkoa/wilaya ninaiarifu mahakama hii kwamba, shauri la jinai/maombi/rufaa
Na. la/ya mwaka litaendesha na mwendesha mashtaka.
Pia, ninaiahidi mahakama kwamba nitahakikisha kwamba mwendesha mashtaka
anahudhuria mahakamani kumwakilisha mlalamikaji/mwombaji/mjibu
maombi/mrufani/mrufaniwa katika tarehe itakayopangwa.
Saini.....
Mkurugenzi wa Mashtaka/Wakili wa Serikali/Mwendesha Mashtaka wa Serikali
Mfawidhi wilaya/mkoa
Tarehe.....mwezimwaka 20.....
Futa isiyohitajika

Dar es Salaam,
27 Februari, 2023

IBRAHIM HAMIS JUMA,
Jaji Mkuu